

# 二月桃花

中華民國一百零二年三月三十一日

歌仔戲劇本：〈二月桃花〉

## 一、創作理念

本劇以清朝沈起鳳所撰之諷刺小說〈桃夭村〉為創作靈感，保留該作者藉此故事諷刺科舉考試營私舞弊、顛倒是非的人性黑暗面，並褒揚堅持正義者之原創精神，而全劇情節鋪陳、人物塑造，皆為新創。

劇本命名意涵：仲春二月，桃花濃豔、繽紛如畫的桃花村，正開展著一段耐人尋味的愛情故事，枝頭上綻放著桃花為男女主人翁純潔而堅定的愛情，做了最忠實的見證；然而，週而復始的花開花謝，也看盡了人性善惡與因果輪迴……

在歷史的洪流裡人性始終未有太大的變異，雖說：「人不為己，天誅地滅」，然而「徇私」、「賄賂」往往毀滅了人世之公平正義。本劇以輕鬆、詼諧的筆調反映社會、針砭時弊。透過觀賞劇中人物的悲、喜遭遇，引領觀眾思索幸福人生之真諦。

## 二、劇情大綱

王群英、陳孟華船行遇盜匪，鏖戰中，王、陳雙雙落水，漂流至蘇州桃花村，群英為劉明所救，劉明告知桃花村之婚姻制度（文墨擂台與品貌大會）。花勝芳於參加「品貌大會」途中，險被朱阿貴所擄，幸得群英及時搭救。王、花二人一見鍾情。

朱阿貴與貌寢女子許牡丹分別賄賂「文墨擂台」、「品貌大會」主考官，且皆名列第一，意外配成對，兩人懊悔不已。群英參加文墨擂台因未賄賂名次殿後，至花家認親，但名次居末的勝芳為抗考試不公，已離家前往太倉州。群英返回家鄉太倉與勝芳終成眷屬。

「文墨擂台」主考官蘇知縣唯恐受賄之事曝光，羅織罪名誣陷花正東（勝芳之父），幸得巡撫鄭士青及時解圍，並使蘇知縣伏法。花正東因難捨父女之情，決定與群英、勝芳同回太倉州定居。臨行前，流連於桃花林中。

附註：按清朝沈起鳳所撰之〈桃夭村〉小說中所言：每年二月，桃花盛開之際，桃花村官方皆會為未婚之男女（年齡的限制男子十八至二十歲；女子十六至十八歲）舉辦一場婚姻配對的比試，男子「文墨擂台」比文才，女子「品貌大會」則是選美。考第一名的才子配第一美人，即依放榜結果，男女名次：第一名配第一名、第二名配第二名，依此類推，不能反悔，否則即是違法。「文墨擂台」及「品貌大會」放榜後，男方必須到女方家確認親事，並商酌成婚事宜。

### 三、人物簡介

按出場順序：

王群英：十九歲，饒富正義之氣，不向惡勢力屈服。本為仕宦之後，文武全才，父親因故官職遭革除後，與義兄陳孟華經商維生。

陳孟華：二十歲，乃王群英之義兄，自幼為王群英之雙親收養，為人敦厚善良，能知恩圖報，與王群英情同手足。

海賊王：年約三十餘，強盜首領，專打劫商船，為財不擇手段，視人命如草芥。

劉明：年約五十歲，桃花村漁夫，古道熱腸，雖癩腿仍自食其力，於捕魚時，救回傷重落水的王群英。

花勝芳：脫俗絕塵、貌美如花，年方十八，卻擁有卓絕的智慧，為了反抗不公平的婚姻制度而逃婚。其不與世人同流合污的人格特質，讓王群英對其既愛又敬。

春香：十七歲，為花勝芳之丫嬛，機伶率真，善體人意，且處處忠心為主。

朱阿貴：年十八，依恃裙帶關係，以及父親權勢而橫行霸道，本性雖非極惡劣，然生性懦弱，無識人之明，行事又缺乏判斷力，以金錢賄賂文墨擂台主考官（蘇知縣）欲贏得美人歸，卻弄巧成拙，娶了惡女許牡丹。

四海：年約十七，為朱阿貴之酒肉朋友，狐假虎威仗勢欺人，慫恿朱阿貴強擄花勝芳，卻又能適時閃避災禍。

許牡丹：十八歲，為桃花村富豪之女，不僅貌醜且性情蠻橫驕縱，為能順利嫁得才郎，在品貌大會結果公佈前賄賂主考官（朱阿貴之母），卻意外和朱阿貴配成對。

許金枝：十七歲，許牡丹之堂妹，喜怒不形於色、城府頗深，乃教導許牡丹行賄之關鍵人物。

花正東：年四十餘，為人正直，為官廉潔。辭官而隱居於桃花村，文墨擂台主考官之一，痛恨考場賄賂之歪風，雖嚴拒朱阿貴之行賄，但其女花勝芳仍蒙受此風之害，品貌大會名列榜末，自責之餘，要女兒離家抗婚。

蘇知縣：年約五十。見錢眼開，唯利是圖，桃花村婚姻制度之文墨擂台主考官之一，接受賄賂、枉顧公平正義，後因貪瀆之罪而自毀前程。

朱母：朱阿貴之母，寵溺朱阿貴，欲為其子娶得貌美妻子，而將花勝芳名次挪至榜單最後，又因一時為金錢所誘惑，接受賄賂，卻出其意娶進了惡媳許牡丹。

蘇夫人：蘇知縣之妻，愚鈍顛預，因無知公開示出其夫所收受之巨額財物，而被視為共犯，與蘇知縣雙雙身陷囹圄。

王母：王群英之母，為人友善而慈愛，感動為逃婚而離家的花勝芳，奠定了良好的婆媳關係。

王父：王群英之父，雖仕途不順遂，內心亦能平和知足。

鄭士青：年四十。新任江蘇巡撫，花正東結拜之弟，揭發貪官之無恥行徑，因能明察秋毫，及時解救花正東免其受誣陷，並將蘇知縣夫婦繩之以法。

#### 四、各幕劇情概要

##### 第一幕：餘生

出場人物：王群英、陳孟華、劉明、海賊王及其手下

劇情概要：王群英、陳孟華二人出外經商，船行遇到盜匪海賊王一行人，嫉惡如仇的王群英不願向惡勢力屈服，堅持不交出財物，在雙方纏鬥過程中陳孟華不慎落水，王群英為營救義兄跳入惡水之中，漂流至桃花村，幸為漁夫劉明所救。劉明告知王群英桃花村男女婚姻配對之制度及規則，並鼓勵王群英參加「文墨擂台」。

##### 第二幕：嬉春

出場人物：王群英、花勝芳、春香、朱阿貴、四海、許牡丹、許金枝

劇情概要：花勝芳、春香主僕二人，於參加品貌大會途中，因流連於爛漫的桃花美景，而使得朱阿貴及四海有機可趁。朱阿貴因垂涎花勝芳之美貌，因而聽從四海的慫恿，動手強擄花勝芳。適逢劫後餘生的王群英出外欣賞春光，而巧救花勝芳。王群英、花勝芳二人一見鍾情，但花勝芳既已報名參加「品貌大會」，便無法主宰自己的婚姻，春香告知王群英唯有在「文墨擂台」奪得文魁，方能和花勝芳配成對，才華橫溢的王群英因而決定參加「文墨擂台」。

##### 第三幕：賄賂

出場人物：王群英、花勝芳、春香、朱阿貴、花正東、蘇知縣、蘇府管家  
朱母、許牡丹、許金枝

劇情概要：胸無點墨的朱阿貴為娶得美人（花勝芳）歸，欲賄賂主考官，雖遭主考官之一花正東痛罵而嚴峻拒絕，但仍順利賄賂了另一名主考官蘇知縣，要求文墨擂台比試名次居冠。而貌寢女子許牡丹、許金枝也同樣以金錢收買主考官朱阿貴之母，竄改品貌大會名次，朱母見錢眼開，將醜女許牡丹名列第一，而貌美如花的花勝芳卻置於榜末。

##### 第四幕：比試

出場人物：王群英、朱阿貴、花正東、蘇知縣、蘇夫人、試務差役

劇情概要：王群英、朱阿貴於文墨擂台試場相遇，兩人談論筆試之文章要義：論國君治國之道。朱阿貴腹笥甚窘、胸無點墨，完全曲解題意，王群英則滿腹經綸、辯才無礙。口辭比試時，一才思敏捷、巧言妙對；一搜索枯腸、胡拼瞎湊形成對比。王群英也因而贏得主考官花正東之讚賞。文墨擂台名次裁決者，也是主考官之一的蘇知縣，因王群英未賄賂，且推斷其應為外地人，而將其名次由榜首改列至榜末。

#### 第五幕：放榜

出場人物：王群英、花勝芳、春香、朱阿貴、花正東、朱母、劉明

劇情概要：品貌大會榜單公佈，花勝芳名次墊底，父親花正東明知主考官不公正但卻又無奈，在無計可施的情況下，要女兒離家逃婚。當日午時，文墨擂台比試放榜，王群英為名次殿後而感到不平繼而絕望。隨後，又得知能與勝芳配成對，心情轉悲為喜，急去認親。然而，花勝芳已女扮男裝離家前往太倉州，失落之餘，王群英決定返回家鄉太倉，並藉此打探勝芳之消息。朱阿貴賄賂得逞，得知自己名列第一，欣喜回報朱母。朱母告知許牡丹賄賂之事，品貌大會榜單已公佈牡丹奪冠，朱阿貴應娶惡女許牡丹為妻，阿貴為自己賄賂行徑懊悔不已。

#### 第六幕：巧配

出場人物：朱阿貴、許牡丹、朱母、丫嬛

劇情概要：洞房內全無歡欣氣氛，新人朱阿貴、許牡丹以苛刻的言語互相揶揄、數落。許牡丹並大肆謾罵婆婆，指責朱母不該收受錢財，卻徇私讓自己嫁予不學無術的朱阿貴，而未依其意安排一段好姻緣。朱母一時貪念，接受賄賂，娶來惡媳，此結果是其始料未及的（其事先並不知朱阿貴賄賂一事），而生性懦弱的阿貴因賄賂主考官，導致終身必須與河東獅吼為伴，母子二人，皆悔不當初。

#### 第七幕：溫情

出場人物：王群英、花勝芳、陳孟華、王母、王父

劇情概要：女扮男裝的花勝芳，於太倉渡頭巧遇歷劫歸來的陳孟華（王群英之義兄）。陳孟華邀勝芳返家，與陳孟華同住的王父、王母（王群英之雙親）熱情收留花勝芳。王母與花勝芳一見如故，花勝芳坦承女扮男裝，王母盼勝芳成為自己的媳婦，並欲試探其心意時，恰逢王群英返回，王群英告知文墨擂台結果，花勝芳驚訝命運之巧妙。王群英、花勝芳有情人終成眷屬，王父、王母也喜與兒媳團圓。

#### 第八幕：歸家

出場人物：王群英、花勝芳、花正東、鄭士青、蘇知縣、蘇夫人、隨從數人

劇情概要：江蘇新任巡撫鄭士青（花正東之結拜兄弟）即將上任，貪官蘇知縣因懼怕自己接受賄賂之事曝光，欲先發制人，巧織罪名要花正東遠離桃

花村，花正東不畏強勢，並指責蘇知縣貪瀆，蘇知縣惱羞成怒欲陷花正東入獄，千鈞一髮之際，王群英、花勝芳、鄭士青即時趕回，解救花正東，鄭士青並設巧計將蘇知縣繩之以法。在王群英及花勝芳的親情攻勢下，花正東亦接受女兒及準女婿之建議同回太倉州定居，離開桃花村前，三人依戀難捨，流連於落英翩翩的桃花林中。

## 五、劇本正文

說明：

(一) 本劇共分：餘生、嬉春、賄賂、比試、放榜、巧配、溫情、歸家 八幕

(二) 本劇各幕之間或部分場景轉換以燈光暗來代替幕落下以加強戲劇的流暢性

### 第一幕 餘生

地點：商舫上、桃花村（漁夫劉明家中）

人物：王群英、陳孟華、海賊王及其手下三人、劉明

場景：（一）商船上，王群英、陳孟華行船遇盜匪數人，群盜手持亮晃晃刀械，

王群英則赤手空拳，纏鬥中，群英時時顧及義兄陳孟華人身安全。

（二）漁夫劉明居所——破舊茅屋中。不慎落水的群英被漁夫劉明救回，

群英清醒後眼前人事物全然陌生。

（幕啓）

（一場鏖戰，雙方皆負傷）

海賊王：你這個臭小罔，莫閣作困獸之鬥，只要乖乖交出錢財，本王就饒你莫死。

（陳孟華驚嚇，躲在王群英後，示意王群英交出錢財保命）

孟華：義弟，這個海賊王是刮人無 眼的，你……就……。

群英：義兄，有我佇咧，你免驚！（向盜匪）你這個目無法紀的賊寇免數想我會

向你屈服，愛錢無；愛命，就看你的本事！

海賊王：若按呢，你就納命來！兄弟啊！予伊死！

（混戰之中，陳孟華不慎落水）

群英：義兄……啊……

（王群英奮力一搏，群盜自知不敵）

海賊王：算你狠！莫閣予我拄著，兄弟啊！咱行。

（群盜跳水離去）

群英：義兄啊！我來救你……。

（王群英負傷跳下水）

（燈光暗）

（落水後的王群英被劉明所救）

（劉明上）

劉明：【雜唸仔】五更雞公一咧啼，一跛一跛江邊掠魚閣掠蝦，看見草堆一跤鞋，  
好奇去看驚一咧作狗爬，好親像有人倒佇遐，四肢困齊齊。愈想  
愈毋對，我吸大氣、放大膽、咬著牙，一步一步探真假，唉哟！  
竟然是一个受傷的少年家，我對胸坎共搥三下，將伊的氣來提，  
喝咻掠魚人共伊扛來阮兜，到這陣還昏迷。

劉明：已經經過幾若个時辰了，毋知彼个少年家清醒袂？

我入來叫看覓。

（劉明轉身向內）

劉明：喂！少年咧，精神囉！

（王群英上，全身乏力）

群英唱：【】若浮若沉氣虛弱，回想賊寇豺狼惡，  
為著錢財心狠毒，面對強勢我絕不屈服。

（白）頭可斷不能受辱，無畏人單力又薄，

手無寸鐵抗強暴，宛如弓下的烏雀。

（續唱）【】奮力搏賊不顧身，連累義兄成波臣，  
眼前景物全袂認，毋知家已是鬼抑是人？

(白) 眼前有一位老大哥，定能爲我解開心中的疑惑

急急向前將揖作……請問這位老兄哥……

(王群英體力不支，劉明扶住王群英)

群英：你是……

劉明：我叫劉明，你叫我老劉就好了。謝天謝地，總算等甲你清醒過來囉！遮是蘇州的桃花村。透早看你昏倒佇江邊，我拜託村裡的人共你扛轉來，你已經昏迷五、六個時辰了。你姓啥物？名啥物？家佇佗位？

群英：小弟姓王名群英，江蘇太倉州人氏。幾工前，恰我的義兄，坐船出外經商。不料，拄著一群匪賊欲搶錢財，小弟毋向惡勢力屈服，全力反抗，打退匪賊，但是義兄煞不慎落水，生死不明，爲救義兄，我嘛跳落水中，唉！（拭淚）不能救義兄的性命，家已嘛險入鬼門關，能得劫難餘生，不知該如何報答劉大哥的救命之恩？

劉明：公子毋免多禮。你遮爾重情重義，真是使人欽佩。你身體虛弱，又身受重傷，若無棄嫌，會用得暫時躑佇阮兜，等甲傷勢好了後，再閣轉去嘛未慢。

群英：這……劉大哥相救，小弟已經感激不盡，怎好閣再攪擾呢？

劉明：我知，我劉明雖然行動不便，但是猶有能力抓魚抓蝦，無欠你一副碗箸啦！

群英：老兄哥，素昧平生，您的盛情小弟感激在心，猶毋過……

劉明：就按呢啦！這陣是二月，阮桃花村的桃花當咧開，桃花一咧開，就是阮桃花村上嬉上鬧熱的時陣。

群英：哦！爲啥物呢？

劉明：因爲村裡佇這個時陣，會舉辦一個盛會，

群英：啥物款的盛會呢？

劉明：佇每一年的二月桃花盛開時，官方攏會爲適婚的男女舉辦一場婚姻配對的比試，查甫人恰查某人分開比試，查甫人的「文墨擂台」是考文才，查某人是選美，也就是「品貌大會」。考第一名的才子配第一美人；總講一句，



就是第一配第一、第二配第二，照按咧憑頭排……

群英：上尾仔一名毋就娶醜某囉！

（群英、劉明大笑）

劉明：小兄弟，毋知你娶某袂？外地人嘛會用得參加喔！猶毋過有年齡的限制：男子十八至二十歲，女子十六至十八歲，而且毋管考著第幾名？娶到啥物款的某？攏袂用得反悔的，若無，是違法的，愛吃官司的。

群英：小弟今年十九歲，細漢時曾經定親，但本來做官的爹親因故被革職，家道中落了後，就予對方強迫退婚了。

劉明：那種嫌貧愛富的人欲退婚就予伊退吧！你不妨去參加文墨擂台，無的確，會娶到一個才貌雙全的家後。

群英：老兄哥！你誠愛講笑，我現此時已經自身難保了，哪有多餘的能力娶妻呢？

劉明：照我看來，你一定讀過袂少的冊，像你按咧文武雙全，將來必定有出脫，這馬你好好歇暍，等身體一好，出門齣齣咧，四箍圍仔攏是桃花，好好欣賞，才袂枉費你來桃花村行一趟，參加文墨擂台的代誌猶有幾天的時間，你再閣慢慢考慮。

群英：既然劉大哥按呢講，小弟就恭敬不如從命囉！

（燈光暗）

## 第二幕 嬉春

地點：桃花林

人物：王群英、花勝芳、春香、朱阿貴、四海、許牡丹、許金枝

場景：仲春時節，春光爛漫，林中桃花綻放，如詩如畫，又正值品貌大會，劇中主要人物皆盛裝出遊，並交織出巧妙的緣分。

（勝芳、春香上）

春香：小姐！妳緊看，遐有一片桃花林。咱去彼邊看覓，好無？

勝芳：好是好，但是恐怕會耽誤著參加「品貌大會」的時間，而且彼个所在好親像誠偏僻……。

春香：唉呀！小姐妳想傷濟了，咱去一時仔就好，袂耽誤著時間，拜託啦！

勝芳：嗯！難得出來，又閣拄著好風景，無好好啊欣賞實在是傷可惜囉！

春香：太好了，小姐咱就行吧！

勝芳唱：【】**桃花遍野伴人行，燕燕雙飛訴濃情。**

**寂寞深閨歲月增，聊與詩書結朋。**

**花開當謝是宿命，落紅隨風舞輕盈，**

**美景當前心緒亂莫名，女兒心事向誰來表明？**

春香唱：【雜唸仔】**今仔日歡歡喜喜將頭梳，毋免規日繡房咧看窗紗，**

**難得出門，見著人閣驚歹勢，沿路風景看甲真詳細，**

**這個五花十色的人世，迷人的所在比我想的閣較濟，**

**只是美好的時光容易消逝，希望日頭永遠袂向西。**

春香：小姐咱來去彼邊看。

勝芳：嗯！

（花勝芳、春香下）

（阿貴、四海上）

阿貴唱：【雜唸仔】**桃花村，上出名，姑娘攏叫我緣投仔兄，**

**父母生我富貴命，金銀財寶攏開袂乾。**

四海唱：【雜唸仔】（對阿貴極盡阿諛奉承）

**吃飽閒閒來逛街，朋友濟，滿四界，**

**欲娶某，姑娘嘛相爭嫁，**

**風流才子的名聲，是真毋是假。**

阿貴：我朱阿貴上驚看到冊，看到冊我就感，阿爹叫我愛用功，偏偏掀冊我就夢

周公，寫文章，先生講水雞跳落水，不通、不通。

四海：對對對！讀冊有啥路用，有錢就會當做祖公。阿貴兄，毋是我在阿諛你，

全桃花村有啥人像你遮爾海派，開錢目調攏毋捌一咧，會當做你的朋友

實在感甲無比的光榮。

阿貴：四海，你實在是太了解我啊！聽你講遮的話，我心花攏開了，下暗我一定好好啊請你。

四海：好啊！好啊！咱足久攏無去桃花樓了，有人足想你喔！

阿貴：哈哈！咱這馬先欣賞桃花，暗時再閣來去淋燒酒、順繼……。

(阿貴、四海得意曖昧大笑)

四海：咱就作陣去頭前的桃花林看桃花，行！

(阿貴、四海下，花勝芳、春香上)

春香：小姐，真嬌呢！

勝芳：花嬌是嬌，只可惜好春不常在，閣再無佻久就欲離開枝頭，化爲春泥了。

春香：唉喲！小姐，花謝就謝了，明年會閣再開，難得出來耍，心情就放較輕鬆咧啦！

勝芳：是啊！平常時足不出戶，今仔日是一年一擺的品貌大會，才會當出閨房，是應該愛歡喜。只是……

勝芳唱：【】禮教枷鎖禁閨闈，三從四德應守規，  
男兒爲天不可違，女兒命運任風摧，  
千古悲喜無所謂，莫問自身應是誰？  
品貌大會尋依歸，唯恐錯配願難遂。

春香：原來妳咧煩惱妳的終身大事哦！小姐妳生作遮爾嬌，時到妳一定會嫁著一個真好的尪婿，小姐，妳免煩惱啦。

勝芳：自從咱舊年來到了桃花村，就有聽過品貌大會和文墨擂台的主考官收受金錢的傳言。妳敢閣相信比賽的結果會公平嗎？若毋是阿爹希望我會當配一個有才華的尪婿，我根本就無想欲參加品貌大會。

春香：老爺敢講不知影「烏西」這件代誌？爲啥物閣愛妳去參加呢？

勝芳：因爲全桃花村有讀過冊的查甫囡仔，攏會藉著文墨擂台來比較文才，一來會用得了解自己的實力，二來嘛有機會娶到全村上嬌的查某囡仔啊！

春香：小姐妳規工佢我躡佇厝裡，哪會知影遮爾濟代誌？

勝芳：這攏是阿爹對我講的，所以伊雖然聽過烏西主考官的傳聞，但是伊對我有信心，一定愛我去參加。

春香：既然按呢，妳嘛叫老爺送錢去予主考官，預防萬一嘛！

勝芳：妳綴佇我的身軀邊遐爾濟年，敢講還無了解我，若是世間的代誌攏會當用金錢交換，猶有啥物是可貴的呢？尤其婚姻是關係一生的幸福，若攏愛聽任金錢佢命運的安排，毋是太悲哀了。唉！多說無益，這是妳我身為女人的宿命，難以改變，但是，我堅持拒絕賄賂的歪風，我……相信月下老人會替我做上好的安排。

春香：對對對！小姐，妳按呢想就對了，像小姐這款才貌雙全的人，一定會嫁著一个如意郎君(笑)。

(阿貴、四海上)

阿貴唱：【】**嬲花順手挽一蕊，妖嬲無輸紅玫瑰。**

四海接唱：**花花草草攏全類，姑娘啊就有瘦嘛有肥。**

四海：阿貴兄，莫顧看花草啦！你敢無看到頭前的「美人花」？

阿貴：騙人毋捌，啥物花攏聽過，就是毋捌聽過「美人花」，你講美人花佇佢？

四海：你目睷 較金咧！「美人花」佇遐。

阿貴：嬲！誠是嬲！四海啊！我我我……已經去煞著頂腹蓋啊！

春香：小姐，頭前有兩個菁仔穰，目睷仁看咱看甲欲落下來了。(大聲)喂！恁毋捌看過嬲姑娘仔？

阿貴：講耍笑，阮出門專門攏是咧看姑娘的，無論是高的、矮的、大籐的、瘦的我攏很 欣賞，若是像妳這款模樣的，本大爺會當勉強娶妳做細姨。

春香：小姐！妳看啦！這款人，講話誠無站節，妳講一寡仔道理予伊聽。

勝芳：這位公子，阮與你素昧平生，你不該出言不遜、輕薄他人。

阿貴：嘿嘿！這個嬲姑娘啊！妳講了對，若是妳，我那會甘予妳做細姨，妳嫁我

做某好啦！阮兜有錢有勢，會當嫁予我，是妳頂世人燒好香咧！若是彼个恰查某，四海啊！伊較適合你。

四海：嬌姑娘啊！妳敢毋知影，企佇妳面頭前的人是大名鼎鼎的朱阿貴？

春香：乎！朱阿貴，失禮哦！阮毋捌聽過，伊是啥物大人物啊！

四海：伊的表姊是當今的貴妃，伊的老爸嘛佇朝廷做大官，若是嫁予伊，妳就有享受不盡的榮華富貴。

阿貴：就是啊！全桃花村有佻濟姑娘數想欲嫁我，我堅持欲等今年的品貌大會，娶第一名，也就是全村上嬌的姑娘做某，因為男子的文墨擂台我一定提冠軍啦。

春香：呸！聽你講話就知影你肚子裡攏是貯……

阿貴：冊。

春香：是貯牛屎啦！毋捌字閣兼無衛生，你有啥物才調會當娶著全村上嬌的姑娘，哼！

阿貴：妳誠是看貓沒點呢，查某人若嫁一个像我這款的好額炆，就一世人免煩惱吃，免煩惱穿，恁誠實不知影好歹。

四海：恁敬酒毋食食罰酒，阿貴兄，莫佻伊囉唆，將伊掠轉去做某！

阿貴：這這……

四海：你哪遮爾無膽，有恁老爸予你做靠山，你咧驚啥？先搶先贏，等生米煮成熟飯，再閣送一寡仔錢予你的丈人、丈母毋就好囉。

阿貴：好啊！我猶毋捌看過遮爾嬌的姑娘，就將伊掠轉去做某，嘿嘿嘿。

四海：嬌姑娘啊！我看恁猶是家己乖乖綴阮行，較省咧阮動手。

春香：小姐，咱緊走！

（花勝芳、春香欲逃）

四海：嘿嘿！遮干但一條路，恁欲走去佻位？

（阿貴、四海擋住去路）

春香、勝芳：救人哦！救命啊！

（勝芳，春香轉身逃離，阿貴、四海動手抓人並緊迫於後）

（群英上）

群英：病體初癒，本該踏上歸程，只因劉大哥盛情挽留，在此流連數日，此地名  
為桃花村，真是名副其實啊……

群英（唱）：**【】綠煙紅霧畫天成，落英翩翩草繁盛，**

**群芳競春桃花勝，雲淡風輕神氣清。**

群英：眼前一片桃花林如詩如畫，我應該學武陵人前去尋訪桃花源。

春香、勝芳：救人哦！救命啊！

群英唱：**【】山林傳來救命震天呼，**

（阿貴、四海、勝芳，春香四人一陣拉扯，群英營救）

群英續唱：**欺負弱女兩狂徒，目無王法實可惡……**

（王群英給阿貴一頓飽拳，四海趁機閃躲在一旁）

阿貴接唱：**共我拍甲土土土。**

四海：啊好，你你你……共阮會記咧！阿貴兄，咱走！

（阿貴、四海落荒而逃，花勝芳因腳扭傷而跌坐在地）

春香：噯喲！小姐，你的跤是按怎了。

群英：小姐，毋知愛在下鬥相共無？

勝芳：公子替阮解圍，實在感恩不盡。我的跤只是小可仔傷，猶會當行，公子的大恩，他日再闍報答，阮袂當在此久留，告辭了。

（春香扶著花勝芳欲離開）

勝芳：唉喲！

（王群英忘情扶住花勝芳，花勝芳含羞推開）

群英：誠失禮！我……

春香：唉喲！你真戇呢，有啥物話緊講，緊對阮小姐講啊！哪無阮是欲走囉！

群英（唱）：【】萍水相逢卻鍾情，心起波瀾難安寧，

此去只怕山水隔萬重，急問小姐的芳名。

勝芳（唱）：【】滿面緋紅暗歡喜，朱唇欲啓又游移，

看伊眉宇含英氣，不知不覺萌情絲。

勝芳：春水無端起漣漪，春香妳應知我心意，含羞帶怯難開嘴，妳就替我回答伊。

春香：愛我講嗎？公子，阮小姐姓花名叫勝芳，我叫春香，你呢？

群英：在下王群英。姑娘我……

春香：我知，你有足濟問題想欲問阮小姐，但是，阮趕緊欲去參加「品貌大會」，無時間回答你的問題，我偷偷共你講，你若是對阮小姐有意思，你就愛去參加「文墨擂台」，無就無機會囉！

群英：我了解，我會去，勝芳姑娘，我絕對袂予妳失望的。對啦！妳的跤受傷，爲著安全設想，應該由我護送兩位姑娘到試場，比較較適當。

春香：小姐，王公子講了有道理，妳看咧……，（見花勝芳猶豫）萬一咱又閣拄著歹人呢？妳的跤受傷，有王公子護送較妥當啦！

勝芳：嗯，既然如此，就有勞公子了。

群英：勝芳小姐，春香姐，請。

（王群英、花勝芳、春香下，阿貴、四海上）

阿貴：四海啊，誠奇呢？規桃花村的人我攏捌透透，彼个人哪會毋捌看過？

四海：是啊！共你拍得做狗爬，想欲報仇，閣毋知欲去佗位搵人？

（阿貴上上下下打量四海）

阿貴：講嘛奇怪，爲啥物我予人拍甲烏青兼淤血，你按怎規仙攏好好？

（四海假裝受傷）

四海：唉喲！我跤頭跌腫起來，胸坎予伊捶一个著內傷，咳咳……。

阿貴：敢按呢？

四海：當然是真的啦！阿貴兄，時候無早了，毋通袂記得咱下暗閣欲去……。

(阿貴、四海兩人竊笑，阿貴猛然想起要事)

阿貴：袂使，四海，我下暗有足重要又閣足急的代誌欲辦，另日再閣請你去酒樓慶祝。

四海：有啥物代誌遮爾重要又閣遮爾急？從來毋捌看你有過比淋酒、看婿姑娘較重要的代誌。猶閣有，你拄才講「慶祝」，是欲慶祝啥物？

阿貴：講到予你捌，嘴鬚好拍結。另日再閣慢慢共你講，咱先去品貌大會入口看婿姑娘啊。行嘍！

(金枝、牡丹上)

(數名女子往來台上，幾名男子在旁窺看)

金枝唱：【】金枝玉葉富貴家，紅顏堪比艷桃花，  
品貌大會人人誇，是啥人好運能將我娶。

牡丹唱：【】百花爭妍無希罕，花中之王是牡丹，  
王孫公子想欲親事攀，毋是才子就慢慢阿等。

幕後唱：【】大地盛宴春意鬧，紅男綠女爭出頭，  
你欺我詐暗計較，機關算盡徒懊惱。

阿貴：唉喲喂呀！彼个烏趣趣、規身軀肥滋滋。

四海：彼个凹鼻、減一齒。去考試考到尙尾的就大難臨頭囉！好佳哉，我年歲還袂到，還袂當參加。阿貴兄，你就加油了。既然你講猶有急事欲辦，我就先轉去囉！

(四海下)

阿貴：其實，今仔日我看到彼个婿姑娘啊，魂早嘛去予伊勾勾去了，伊一定嘛是來參加「品貌大會」的。慘囉！我平常時也無讀啥物冊，若是欲去考，毋就會排佇上落尾，萬一娶到矮閣肥閣短彼个？毋就衰一世人。哈哈！好加哉，阿爹足早就攢好厚禮，伊交代我若欲去考試，就先去拜訪主考官，請伊多多關照，哈哈！欲娶第一名的美人，誠是簡單啦！



(燈光暗)

**第三幕 賄賂**

地點：花家、蘇府、朱府

人物：王群英、花勝芳、春香、朱阿貴、花正東、蘇知縣、蘇府管家、朱母、許牡丹、許金枝

場景：朱阿貴、許牡丹爲求美好姻緣，遂欲以金錢賄賂，奔忙於主考官宅第  
(群英上)

群英唱：【】**桃林深處遇紅粉，驚鴻一瞥失了魂，**

**伊說家在桃花崙，綠水花牆添清韻。**

群英：嗯！屋舍雅樸，桃花點點，宛如世外桃源。勝芳姑娘應該就是躑佇遮。(群英欲敲門，又猶豫。)伊講伊的爹親辭官隱退，躑佇這個開滿桃花的山林調養身體，我貿然造訪恐怕傷過唐突，不如等我比試一舉奪魁，再正式拜訪也袂慢。

(王群英轉身欲離開，卻見阿貴鬼鬼祟祟前來，群英隱身於一旁靜觀)

阿貴：哈哈，我實在有夠巧，先收買主考官就對了。頭前是兩個主考官其中一個——花正東的厝，躑佇這種破糊糊的草厝仔，伊一定誠欠用，哈哈！我成功的機會，誠大哦！

(阿貴敲門)

阿貴：喂！有人佇咧無？

(花正東開門)

正東：你是何人？來遮何事？

阿貴：我叫朱阿貴，我欲揣花正東。

正東：你揣老夫有何貴事？

阿貴：原來你就是花老爺喔！我有代誌欲拜託你，拜託你成全……。(左顧右盼)

佇遮講無方便，入去厝內再閣講。

（阿貴強行入內，花正東緊隨其後欲制止卻來不及）

正東：到底有啥代誌你緊講。

阿貴：俗語講：『男大當婚，女大當嫁』，我今年已經十八歲。

正東：你欲娶妻，共我啥物關係？

阿貴：當然有關係囉！你予人選做文墨擂台的主考官，我想欲娶嬌某，所以攞好媒人禮請你收起來，文墨擂台予我第一名，我絕對袂予你吃虧。

正東：原來你是來賄賂的，你行毋對所在、揣毋對人囉！

阿貴：遮有三百兩銀，你就收起來，予我在文墨擂台提著第一名，愛予我娶到桃花村尙嬌的姑娘。

正東唱：【】聞言罵聲朱阿貴，心懷不軌顛倒是非，

倅禮敗俗斯文毀，怒火沖天驅趕敗類。

正東：我毋是見錢眼開，貪贓枉法的人，你免想要用錢買榜首之位，你即時共我出去。

阿貴：三百兩嫌傷少啊！我會當閣加予你三百兩……

（阿貴再取出銀兩）

阿貴：好啦！你就收落來啦！莫愛吃又閣假細膩。

正東：朱阿貴！你毋通以為人人攏親像你全身的銅臭味。你馬上共我出去，若無，我將你送官嚴辦。

阿貴：好好好！你來這套，我走，以後逐家相拄會著。

正東：哼！真是無恥之徒！

（花正東轉身入內）

（阿貴怒出花家門）

阿貴：真是家己討皮痛，彼个臭「花」、死「花」，看著白花花的銀兩竟然袂痾貪。啊哈！反正主考官毋但一个，就毋信每一个攏像伊按呢，我閣繼續來揣，

哈哈。

（王群英出現，阿貴見王群英嚇破膽）

阿貴：啊！是你喔，英雄啊！麥閣共我拍啦！搶查某攏是四海的鬼主意，你饒我一命啦！

群英：這位兄臺，莫急欲走，你放心，我袂閣再拍你囉！

阿貴：你欲錢嗎？我予你。

（阿貴打開錢囊，群英以手制止，並注意到袋口上繡一「貴」字）

群英：我無愛你的錢，但是你的錢袋仔十分特殊，頂頭繡一个「貴」字，彼是……

阿貴：彼是我的名，我叫朱阿貴啦！

群英：你爲何紮遮爾濟銀兩出門呢？

阿貴：啊！就是欲送予……（搗住自己的嘴）啊無啦！因爲我的朋友誠濟，平常時出門就慣勢紮足濟錢請人啦！

群英：你講的是實情嗎？

阿貴：英雄啊！我無時間共你開講，我猶有重要的代誌欲辦，我欲走了，另日我再閣請你去酒樓淋燒酒啦！

（阿貴匆匆離去）

群英：看伊講話吞吞吐吐，行爲鬼鬼祟祟，我應當綴伊的後面一探究竟。

（群英下，阿貴上）

阿貴：哼！彼个花正東，真毋知影好歹。予我去踢著鐵板，另工再閣報這個老鼠仔冤。這是另外一个主考官蘇知縣的厝，有拄才的經驗，我這擺愛細膩，掣好我的銀兩入來去。

（蘇府管家正好在門口，朱阿貴向蘇府管家耳語，管家點頭引朱阿貴進入）

阿貴：朱阿貴拜見大人。

知縣：朱阿貴，無事不登三寶殿，一定是有代誌愛我處理你才會出現佇遮。

阿貴：啊！講甲遮爾歹聽，咱是老朋友啊呢。

（蘇知縣示意管家避開）

知縣：好了，莫來這套，有啥物代誌你趕緊講。

阿貴：你講的喔！大人啊！

（耳語）

你是主考官，我只有這件小小的代誌欲拜託你。

知縣：哎呀！（惺惺作態）我爲人正直、做官清廉是通人知，違法的代誌我是袂曉做。

阿貴唱：【】手捧銀兩恁兜坐，快人快語免猜謎，  
文墨比賽夯手勢，排頭名予我娶嬌妻。  
助我贏得美裙釵，成就姻緣功德濟，  
日後再送謝媒禮，簍袋仔飽飽好食茶。

知縣：我……一向是袂歪哥。

阿貴：我知啦！只是媒人禮啦，拜託拜託。

（阿貴將錢袋遞給蘇知縣）

知縣：只是……

阿貴：只是按怎？免緊張，來啦！（從前襟再取出一些銀子塞與蘇知縣）按呢有夠無？

知縣：唉喲，挈遮爾濟喔！嘿嘿嘿！好好，你行仔內的，這件代誌就包在我身上。

阿貴，一切妥當了，咱來爽爽快快淋幾杯。來人啊……

阿貴：大人啊，另工我一定陪你淋一个「不醉不歸」啦！，這馬我閣有代誌，我先轉去嘍！

知縣：嘛好啦！我嘛該用頭殼好好啊「研究、研究」文墨搨台的代誌，哪按咧，就無送了。

（知縣揮揮手轉身入內，阿貴出知縣府，一直尾隨在後的群英出現）

群英：阿貴兄！

阿貴：唉哟！你親像 壁鬼呢，我這馬身軀沒半銀，我已經講過另日再閣請你，  
你莫一直綴我啦！

群英：阿貴兄！你毋是挈一大袋銀兩入去，爲何雙手空空出來呢？

阿貴：啊就……，嘿蘇知縣就……啊銀兩拍無去啦！

群英：原來這是蘇知縣的府第。

阿貴：我欲轉去啊！啊！毋是，我欲去揣我無去的銀兩了，再會囉！

（阿貴一溜煙離去）

群英：這件代誌看來無單純，朱阿貴挈銀兩慌慌狂狂去花府以及知縣府第，這敢  
恰文墨擂台有關係？

（王群英忽聞談話聲，花勝芳、春香上）

春香：小姐！你的跤有傷莫行遮爾緊啦！

勝芳：咱按透早就出門，傷晚轉去，阿爹會掛心。

春香：唉呀！妳又毋是三歲囡仔，老爺有啥物袂放心的？是啦！妳自小漢就無阿  
娘，老爺疼惜妳親像是心肝頭的一塊肉，伊……（察覺勝芳神色有異）

啊……小姐，失禮啦！我講毋對話了，我真該死。

勝芳：我知道妳毋是有意的，莫自責了，咱緊行！

群英：小姐，想袂到咱遮爾有緣，又閣見面了。

春香：王公子，明仔載就欲文墨擂台比試了，你毋通袂記得去考試，阮小姐一定  
是品貌大會的第一名，你毋通予伊失望呢！

勝芳：春香，毋准閣厚話。

春香：好好，我講傷濟了，我閃去邊啊，恁家已寬寬仔講。

（春香仍於一旁偷聽）

群英：小姐，春香姐是一番好意，莫怪伊。這擺的比試我一定會奪得文魁，小姐  
妳……我……。

勝芳：我知影你的心意，只是今日的品貌大會予我感覺，主考官的態度並無公正，  
比試的結果並無像你所想的遐爾樂觀。

群英：唉！咫尺天涯，爲何咱袂當掌握自己的未來，必須透過無理的制度，做盲目的安排。勝芳小姐啊！我……我……。

春香：嘿！你這個人講話定定大舌，比試是欲按怎得第一，不如你恰阮小姐「私奔」。

群英：私奔！

春香：是啊，你帶阮小姐遠走高飛，就毋免管考試的結果了。

勝芳：袂當！按呢做，毋但會予花家的名聲掃落地，嘛會連累爹親坐監的。

群英：嗯，講的有理，咱袂用得傷自私，勝芳小姐，我一定會光明正大迎娶妳入門，小姐啊！

群英唱：**【】此生若無妳神魂永憔悴**

勝芳接唱：**今日一別爲君掩門扉**

群英接唱：**心如明月映清輝**

勝芳接唱：**長望嬋娟終不悔**

（王群英仰頭對著桃花起誓）

群英：桃花仙子啊！懇請妳爲證，我王群英一定會在文墨擂台獨占鰲頭，並且迎娶勝芳姑娘爲妻，絕不食言。

春香：乎！你講的話，每一蕊桃花攏有聽著，袂使講話無算話。

勝芳：王公子你莫聽春香胡亂講，我……相信你。

（王群英、花勝芳兩人互相凝視並雙手緊握）

春香：咳！日頭欲落山了，頭拄才是啥人講老爺會掛心的？

勝芳：王公子！阮應該愛走了。

春香：（語氣學勝芳）王公子！阮應該愛走了。愛會記得來娶阮——小姐哦！

（群英呆看兩人離去）

(牡丹、金枝參賽後回程經由此徑，兩人且說且走)

牡丹：跋足酸呢，(向金枝抱怨)有轎通好坐就無愛，妳就講欲行路看風景。

金枝：妳的跋若閣毋振動，就欲變豬跋籬囉！

牡丹：妳……

(牡丹被譏諷十分不悅，正欲反唇相譏，不意被轉身的群英撞個正著)

牡丹：唉喲！(勃然大怒)你這個人是無生日啁喔！撞著恁祖媽，你是要按怎賠？

群英：小姐，真失禮……在下毋是有意冒犯……

(牡丹見群英相貌堂堂、風度翩翩轉怒為喜)

牡丹：喔！緣投仔兄，我拄才是共你滾耍笑，我無愛你賠，(一臉嬌嗔)只是你共我撞甲足痛呢，我愛你共人撫撫惜惜咧。

(牡丹擺出嬌態並欲投入群英懷抱，群英驚惶不已，幸而金枝把牡丹拉至一旁)

金枝：喂！好歹你嘛是一个名門千金呢，愛留一寡仔乎人探聽。(對群英)公子你敢會參加文墨擂台？

群英：(為杜絕許氏姊妹非分之想，強調自己不可能與之配成對)在下自幼習武學文，佇文墨擂台必能拔得頭籌，感謝姑娘的關心，在下為拄才的冒失，再次向姑娘道歉，(急欲脫身)我該離開了，告辭。

(群英下)

牡丹：(難掩愛慕之意)喂……我猶毋知伊的名，講走就走，誠性格呢。伊講伊會提著文墨擂台的頭名。(自我安慰)無要緊，我為著品貌大會，是開偌濟時間咧打扮呢！憑我的美貌，我一定嘛會得到第一名的，呵呵呵。

金枝：牡丹啊！身為妳的堂妹，我應該愛講一句老實的啦！憑妳的外表，免數想會得到第一名，妳平常時又毋是無咧照鏡子。

牡丹：金枝啊！妳按呢講敢若是咧講妳家己，唉呀！妳免講話共我鬮洗，我知啦！人婿一定會受人怨妒，我袂怪妳啦！只是妳若是無法度嫁到好尪，千萬莫怪妳的序大人共妳生作這款的模樣，嘻……(暗自得意笑)。

金枝：（冷冷的回應）牡丹，妳講這款話毋驚嘴舌爛去，就算是妳比我卡嬌，又閣按怎？妳又毋是毋知影，咱桃花村，毋但妳我兩蕊花啊！（低聲）妳袂記得猶有一蕊「花」哦？

牡丹：是啥人？

金枝：就是花勝芳啊！就算咱兩個大美人比出高低，嘛無法度保證會當成爲今年品貌大會的冠軍，你若想要嫁予彼个緣投仔兄，只好等後世人。

牡丹：（又怒又急）按咧是要按怎辦？選美的代誌是主考官佇咧決定，若是 眼睷攏脫窗，袂曉欣賞我的美貌，我是要按怎？

金枝：牡丹啊！平常時就看妳巧巧啊，按怎這個時陣頭殼轉袂過來？只要有這……（手比錢狀），就好辦了。我共妳講……

（金枝、牡丹耳語）

牡丹：唉喲！金枝啊！妳無講我攏無想到。唉喲！按呢穩妥當的。講做就做，袂當予別人比咱早一步。金枝，較緊咧，佇品貌大會結果還沒正式公佈進前，咱做伙去拜訪主考官。

（牡丹、金枝下，朱母上）

朱母：阮阿貴啊，規工佇外口拋拋走，干但愛風騷，毋知影欲讀冊。這個不孝子，敢講欲共我娶一个醜媳婦，予我面上無光嗎？嗯，今年的品貌大會，我是主考官，我應該把握機會好好做安排，無娶著有錢有勢的好額媳婦，嘛愛娶著嬌媳婦，嘻嘻嘻……

朱母唱：【】今暗牡丹金枝來阮兜，有事相託驚洩漏，

桌頂銀兩囤一包，將意思講明瞭，

比試結果未知曉，愛我名次向前樵，

做生理道理我尙，有錢毋賺就是了。

（白）牡丹 的錢我攏收了，但是欲按怎安排才對？比試的時陣，有一个姑娘叫花勝芳，生得花容月貌，但是真無彩啦！走路一跛一跛，伊



講伊是毋細膩踐到，毋知是真的抑是假的？

(唱) 【】逐家攏想欲嫁好尪，講白賊是白了工。

**破相就要名次降，嫁來阮兜嘛真好康**

(自圓其說) 嗯！予伊上尾仔一名，哪去配著我彼个毋讀冊的囡，嫁來阮兜，嘛算是彼个跛腳姑娘的福氣。嗯！予許牡丹第一名，許金枝排第二，阮子卡免娶到醜某。哇！按呢的結局實在是太完美了。

(燈光暗)

#### 第四幕 比試

地點：文墨擂台試場、蘇府

人物：王群英、朱阿貴、花正東、蘇知縣、蘇夫人、試務差役

場景：於文墨擂台比試場，王群英、朱阿貴再次相遇，談論考題及口辭比試時兩人的才學有如天壤之別。

(群英、阿貴上)

阿貴：你毋是彼个英雄？你嘛來考試。哦！我知，你嘛想欲娶嬌某乎！

群英：阿貴兄，你莫閣稱呼我英雄啦，在下王群英。

阿貴：喔！王兄，我看你文章寫得誠好哦！若無哪會寫到這陣才出來。

群英：你過獎了。

阿貴：其實彼个題目我嘛感覺誠簡單，啥物「王道」？「霸道」？

群英：題目是「論王道與霸道」。

阿貴：對啦！阮老爸不時嘛咧對我講這款的道理。

群英：哦！既然如此，你是如何發揮的？

阿貴：王道嘛！阮老爸定定講：『有錢就是王道』。有影呢，我籠袋仔錢袋予膨膨飽飽，行到佗？人人攏講我是大爺，打官司、交朋友、詼姑娘啊無往不利；若是講到霸道嘛，自小漢到大漢，逐家攏講我足壓霸，這嘛是共阮阿爹學

的，伊講：『在官場上做人就愛霸道，做代誌愛不擇手段，才會用得步步高升』，哈哈！我講了是毋是誠有道理？

群英：你錯囉！你毋但觀念、做法毋對，連題目的意思嘛完全誤會了。

阿貴：啊？

群英：這是談論一國之君應有的治國之道。王道，所言是：王者所應行之正道，就是為政以德，以德服民者，必能風行草偃，國家方能長治久安；霸道正好相反，國君不施行仁義，一味用極權、霸術壓制百姓，久之，人心必反，國家終致滅亡。

阿貴：（一臉茫然）你講了好親像誠有道理，但是我敢若鴨仔咧聽雷咧。

（試務差役唱名）

試務差役：朱阿貴、王群英輪著恁考「口辭」了，恁兩人一組，綴我來。

（阿貴、王群英跟隨試務差役，到口辭試場門口）

試務差役：記得喔！為著公平起見，你們袂當報出家己的姓名，若無是違規的，恁會當入去了。

（試務差役下）

阿貴：哎喲！忝死我了，文章才寫完，又閣欲「口試」。

群英：是「口辭」，莫抱怨了，咱們進入吧！

（王群英、阿貴進入考場。主考官花正東候於內）

群英：晚生拜見主考官。

（阿貴尷尬微彎腰，花正東見阿貴，露出不悅之神色）

正東：嗯！試場之內，毋免多禮。我出題了。恁詳細聽來，

「天上月圓，人間月半，月月月圓逢月半」，就由你先對。

（手指阿貴，貴皺眉搔頭）

阿貴：有啊！「你咧講東，我咧講西。講講講啥物東西。」

（阿貴手指向花正東又立刻縮回，正東嘆氣搖頭，示意群英）

正東：換你對來。

群英：您聽了，「**今夕年尾，明朝年頭。年年年尾接年頭**」。

正東：對得工整、對得妙啊！閣再出題，聽了……

「**桃花映水，一枝分作兩枝紅**」

阿貴：這擺換伊先。

（花正東點頭）

群英：「**柳絮隨風，數點散開千點白**」

花正東：哈哈「兩枝紅」對「千點白」，對得太好了。

阿貴：閣有我咧。

阿貴：嗯……嗯……「**老母照鏡，二蕊目睷一蕊烏——青**」

正東：哈哈，恁的口辭考到遮為止，恁會當離開了。

（王群英、阿貴離開考場）

正東：兩個考生的文才猶如雲與泥、天恰地，朱阿貴粗鄙不堪，不提也罷。若是

彼位才高八斗的考生，若會當做我的罔婿，該有偌好呢？

（燈光暗）

（王群英、阿貴上）

群英：方才你的對句，講到令堂的目睷烏青是啥物緣故呢？

阿貴：就是阮阿母予阮阿爸拍甲目睷一蕊烏青。阮阿爸講：『查甫人愛有氣魄，

查某人若是無聽話，就愛共伊修理』。

群英：阿貴兄，你按呢講，就偏差囉！

群英唱：【】**夫妻情分百年修，今世姻緣三生求。**

**禍福甘苦共承受，相扶相持到白首。**

**暴力相待如禽獸，拳頭落下恩愛付水流。**

**男子漢就疼惜牽手，琴瑟和鳴長廝守**

阿貴：拍查某嘛毋對哦！

群英：是啊！任何代誌攞愛好好講，拍是袂當解決問題的。對待家後嘛全款，著愛尊重伊、疼惜伊，袂使隨便傷害伊。

阿貴：你講了對，逐擺我看阮阿母予阮阿爸拍甲傷痕累累，暗暗佇咧流目屎，我的心肝嘛誠艱苦。啊！莫閣講遮啦！我佢四海約好，等我考試考煞欲去酒樓啣酒，你作伙來，我請你。

群英：多謝你的盛情，我另有要事。阿貴兄，我看你的本性袂歹，只是交朋友無夠謹慎……。

（阿貴打斷王群英的話）

阿貴：喂喂！你愈來愈像阮兜彼个教冊先生，講的話攞全款，我無閒通好聽，你無愛去，我家已行囉！再會。

群英：唉！真是扶袂起的阿斗啊！

（燈光暗）

（文墨擂台即將放榜，才華橫溢的王群英未行賄賂，蘇知縣爲如何排名傷神）

（蘇知縣上）

蘇知縣：文墨擂台考生有一个叫王群英，伊的文采不凡，論治國之道深思遠慮，見解高超，乃是箇中翹楚，但是伊完全毋捌禮數，袂曉先來拜碼頭，伊的名次，我該如何安排呢？

（蘇夫人上，蘇夫人手端茶水遞與蘇知縣）

蘇夫人：老爺，遮爾暗了，爲何猶袂困？你是佇咧操煩啥物代誌？

蘇知縣：明仔載午時，文墨擂台的結果就欲公佈了，我爲著名次的安排佇咧操煩啊！

蘇夫人：老爺，自你就任以來，文墨擂台名次攞嘛是你佇咧做上尾仔的決定，你攞是按照錢的濟少來排名啊！爲怎樣今年特別傷腦筋呢？彼个朱阿貴毋是挈上濟……

（蘇知縣趕緊阻止蘇夫人繼續說）

蘇知縣：噓！較細聲咧！隔牆有耳，你是欲予全世界攏知影啊！嘿嘿……，毋過  
妳講得足有道理，我何必爲著一个王群英，破壞規矩呢？

蘇夫人：王群英是啥人？伊是哪一家的子弟？

蘇知縣：對啊！伊一定毋是桃花村的人，若無，按怎連名字攏毋捌聽過呢？按呢  
好，就按呢決定，予伊排佇上落尾，我才袂得失村裡彼寡「愛護」我的  
村民啊！

（燈光暗）

### 第五幕 放榜

地點：花家、縣衙門外（榜單公佈現場）、朱府

人物：王群英、花勝芳、春香、朱阿貴、花正東、朱母、劉明

場景：（一）品貌大會放榜，花勝芳名列榜末，花正東義憤難平，返家命愛女離  
家逃婚。

（二）王群英於文墨擂台放榜後欲認親，奈何花勝芳已離家，失落之餘，  
仰頭見嫣然桃花，感傷至極。

（花正東觀榜後回）

正東：天理何在？天理何在？

（唱）：**【】品貌大會榜單懸，吾兒名字榜末現，**

**貪官食錢實惡賤，枉顧公理義憤填。**

勝芳：阿爹，你是按怎？發生啥物代誌？你講出來予我聽，毋通按呢……

正東：勝芳……，我的女兒啊！你你你緊走！

（花勝芳跪下）

勝芳：女兒若是做毋對，阿爹你打我、罵我，女兒攏無怨言，爲何你欲趕我出家  
門呢？

正東：勝芳，你起來。

勝芳：阿爹無講原由，勝芳毋起來。

正東：你無做毋對，這是別人的過錯。

（花正東扶花勝芳起來）

勝芳：這……女兒愚鈍，阿爹講的我猶是聽無。

正東：你敢知品貌大會的結果？

（花勝芳搖頭）

正東：排名殿後妳知無？

勝芳：我……這到底是啥緣故？

正東：總講一句就是考生用錢來賄賂。

勝芳：阿爹，欲改變敢講無法度！

正東：如今唯一的辦法，就是「逃」。

勝芳：我……我會當去佢位？我離開毋就連累阿爹您。

正東：阿爹歲數有了，來日無濟，反倒轉是妳，袂用得葬送妳一生的幸福。

勝芳：這萬萬不能，阿爹啊！

勝芳唱：【】自出世娘親就離了阮，依偎爹親懷中最安穩，

晟我長成苦吞忍，護我惜我十八春。

羽翼既豐應思本，怎能不盡反哺恩。

終身幸福且不論，不孝之人天地難存。

正東：竊查某囡仔，毋是妳對阿爹不孝，是阿爹愛妳走。妳毋通袂記得，當初是

阿爹愛妳去參加「品貌大會」，若是妳因此嫁予一个像朱阿貴彼種心術不正、不學無術的尪婿，予阿爹自責一世人，敢講按呢就是有孝嗎？

勝芳：朱阿貴？阿爹，幾工前伊想欲強搶女兒，伊是一个惡徒……

正東：哼！像伊這種卑鄙無恥的小人，萬一妳必須愛嫁伊……時間無多，妳緊去

款包袱，愈緊愈好，若無等午時一到，男子的「文墨擂台」一放榜，就會有人上門來認親，彼个時陣欲走就袂赴了。

勝芳：女兒毋走，我袂用得連累您。

正東：妳毋走，好！從今以後我嘛毋認妳是我花正東的查某囡。

勝芳：阿爹，敢講我無第二條路會當選擇嗎？

正東：除非妳愛阿爹自責、痛苦一世人。

（春香出）

春香：小姐，妳恰老爺講的話我攏有聽著了，我感覺老爺講了有道理，事到如今，我看妳恰王公子嘛無希望了，妳猶是聽老爺的話，趕緊離開啦！

正東：王公子是啥人？

春香：伊是小姐去參加「品貌大會」半路熟似的人，伊文武雙全呢！小姐嘛有恰意伊，啊！講這攏無效啊啦！老爺我欲恰小姐做伙走。

勝芳：春香，妳恰我情同姊妹，我嘛希望妳作伴，但是我無佇咧這段時間，阿爹猶需要妳幫我照顧，妳留落來替我有孝阿爹，好無？

正東：春香，妳就留落來吧！對啦！早起我出門觀榜的時陣，聽講今早正好有一隻商船欲到太倉州。午時前就欲出發，妳緊準備，趕上這隻船，他日再閣設法恰阿爹連繫。

勝芳：春香，阿爹就望妳多費心。

春香：小姐妳放心，我有辦法予老爺無代誌。

勝芳：妳有啥辦法？

（春香對花勝芳耳語，花勝芳微點頭）

勝芳：阿爹，女兒入內改換男裝了後，就依爹親的意思暫時離開。

正東：嗯！吾兒出門在外，千萬愛保重。

（燈光暗）

（文墨擂台放榜，王群英觀看榜單，心情由雲霄跌落谷底）

（王群英上）

群英唱：【】一心想欲娶勝芳，今日就欲償願望，

滿懷歡喜看文榜……

(群英看榜單，大失所望)

群英續唱：**榜尾之人竟姓王。**

群英：我竟然排佇上尾名。怎會如此？我毋信，憑我王群英的才學，這是無可能的。

群英唱：**【】晴天霹靂夢成空，草包阿貴佔上風。**

**公平正義已淪喪，方寸大亂心徬徨。**

(白) 貪官權勢大，會使挪移乾坤，我只是小小的百姓，又能如何？敢講我恰花小姐註定今生無緣分嗎？不可能，這其中一定有內幕，我不服文墨播台的結果，我不服、我不服……

(王群英如行屍走肉般，途中遇到劉明)

劉明：群英，你是按怎戇神戇神咧？

群英：喔！原來是老兄哥，我……沒代誌。

劉明：我替你去睇「品貌大會」的榜單，結果你敢知影第一名是啥人？

群英：是花勝芳。

劉明：毋是，第一名是全村通知的虎霸母許牡丹，伊毋但生作醜又閣恰北北，娶到伊會衰一世人，我驚你會配著伊，緊來共你講。

群英：我毋是第一名。

劉明：好佳哉。咦！爲怎樣你面憂面結呢（仔細端詳群英，略知原因）。唉呀！這擺的比試，實在是誠識古啦！你毋通囡咧心內。就挈你拄才講著的花勝芳來講，我聽人講伊是大美人呢，結果咧！伊的名煞排佇上後壁。

群英：你講啥物？劉大哥你閣講一擺！

劉明：群英，你共我的手摸甲誠痛，我是毋是講毋對話了？

群英：你講花勝芳是最後一名！

劉明：嗯！規攬好好——無錯！

(王群英喜上眉梢)



群英：太好了，哈哈！這是天意！劉大哥咱緊行！

劉明：你今仔日怪怪哦！你欲拉我去佢位啦？

群英：我歡喜過頭，袂記得共您講，我是「文墨擂台」的最後一名，咱馬上去認親。

劉明：考著上尾仔名，竟然遮爾歡喜，敢若中狀元咧。（見王群英迫不及待走在前）喂！欲認親嘛莫遐爾急，上無嘛愛攢一个禮，少年人毋知影禮數，著愛教。喂！我的跤無方便，你稍等我啦！

（王群英、劉明下）

（花正東、春香上）

（花勝芳離家後，花正東仍牽掛不已）

春香：老爺，小姐攏已經離開，你就莫閣再煩惱了。（見安慰老爺無效）唉呀！女扮男裝的代誌，恁的祖先嘛有做過，結果呢？啥物代誌攏嘛無發生。

正東：阮祖先？

春香：是啊！就是花木蘭啊！伊做兵十二年，遐的阿兵哥攏無人發覺伊是查某的，閣再說咱小姐只是出外一陣子，花木蘭一定會感覺小姐會曉學伊，真，而且嘛會保庇小姐一切平安啦！

正東：妳哦！這個時候，猶有心情滾笑。

（劉明敲門）

劉明：有人佇咧無？阮是來認親的。

正東：「認親」的？這未免傷緊囉！

春香：老爺，先拜託您去開門，我入內準備，您放心，我有辦法對付。

（春香入內，花正東不知春香葫蘆裡賣什麼藥？逕自去開門）

劉明：請問遮可是花府？阮是男子「文墨擂台比賽」的落尾名，專工來認親的。

正東：哼！落尾名。講得敢若誠光榮。

（春香向門口走來，臉上全是紅斑）

春香：哎喲！痛死我了，阿爹你講欲替我沖喜，欲將我嫁出去，共我的垃圾病穢予人，聽講阮魁已經來認親了，人佇佗？

劉明：群英啊，哪會按咧？我聽講花小姐是絕世美人，哪會生作這款咧？

群英：伊毋是花小姐。

春香：啊！王公子，怎會是你？

群英：春香，你爲何變成如此的模樣？

春香：王公子，我這是假的啦！（撕下臉上一塊紅斑）爲著保護老爺佢小姐，我孤不將才扮按咧。

正東：春香，你熟似伊？

春香：是啊，老爺，伊就是小姐的意中人王群英，王公子。

正東：哼！勝芳未免傷無眼光，竟然會甲意一个不識之無的庸才。

群英：晚生拜見花伯父。

花正東：你……，我會記得你，你佇口辭比試的時陣，文思敏捷，巧言妙對，老夫對你十分的肯定，爲何你的成績會敬陪末座呢？（略爲思索）我明瞭了，你佢勝芳的名次攏是受著貪官汙吏動了腳手。

群英：敢問花伯父，勝芳小姐人在何處？

春香：阮小姐爲著逃婚，已經離開遮，坐商船去太倉州了。

劉明：太倉？群英你毋是太倉州的人嗎？

群英：嗯！實在是太巧合囉！晚生是太倉人無錯，我因爲拄著海賊，漂流到此地，已經有數日了。我想欲回鄉探望雙親，嘛會使沿途探聽小姐的消息，我會盡全力去走揣小姐，而且會帶伊轉來桃花村，予伊佢您團圓。然後我猶想……

劉明：（好奇）你想欲按怎？

群英：我欲入京赴考，以證明我的才學和能力，等我取得功名，就會當予小姐過幸福的日子。

（劉明、花正東點頭表讚賞）

正東：嗯！勝芳果然好眼光，男兒志在四方，我欣賞你，如今嘛只好拜託你了。

春香：奇怪呢？老爺您拄才毋是講小姐「無眼光」，哪會變遮爾緊？

正東：哈哈！因為王群英是我心目中真真正正的東床快婿啊！

群英：承蒙花伯父賞識，群英定不負所託。晚生不久留，我與劉大哥就此告辭了。

（燈光暗）

（王群英上，沿途見桃花觸景傷情）

群英：桃花啊桃花！

群英唱：【】你在枝上笑嫣然，豈知花下人事全更變。

人面不見芳蹤化塵煙，枉費昔日意纏綿。

二月飛紅東風翦，身難保全墜深淵，

為護所愛心志堅，粉身碎骨無怨天。

群英：群英欲問花中仙，當初為阮雙人做證見，如今鴛盟尚未實踐，卻又拆散各在天一邊，為何祇默默無一言？任我呼喚千遍又萬遍。

（劉明隨在後）

劉明：群英啊！你著愛振作，毋通袂記得，你答應你未來丈人的話，你遮爾矢志，是欲按怎去走揣勝芳姑娘呢？

群英：嗯！劉大哥您講的有理，我即時轉去收拾包袱，這段時間感謝您的收留，您的救命大恩，群英來日當結草相報。

劉明：小事一項，毋免囧佇心裡，你愛趕緊動身去走揣勝芳姑娘才對。

群英：嗯！就此拜別劉大哥。

（燈光暗）

（朱阿貴觀榜後，得知賄賂奏效名列第一，欣喜若狂返家向朱母報喜）

（阿貴上）

阿貴：阿母啊！你緊出來，我有好消息欲共你講。

（朱母上）

朱母：看你歡頭喜面是有啥物好消息？你毋是去看榜？

阿貴：是啊！我就是欲共您講這件代誌，您臆我考著第幾名？

朱母：阿使講，你一定排佇咧上落尾啊！

阿貴：哈哈！您臆毋對了。阿母喂！我出運啊！

朱母：你講看覓，爲啥物你出運了？

阿貴：阿母您攏毋知影我有佻 咧！比試進前，我有去揣主考官，叫伊安排甲誠妥當。

朱母：是按怎安排？你規工蹣蹣去，冊攏毋讀，我誠實毋知影你到底有佻精光？

阿貴：阿母啊！這真簡單，只要開一寡仔銀兩，遐的主考官就足聽話啊！

朱母：你去烏西？爲啥物攏無予我知？

阿貴：莫講「烏西」遮爾歹聽，只是阿爹愛我送淡薄仔禮而已。毋是我欲隱瞞您 喔！因爲阿爹進前挈錢予我的時陣有交代，這件代誌愈少人知愈好。

（朱母臉色大變）

朱母：你的意思是你挈錢去買上頭名？

阿貴：噓！較細聲咧（看看四周）。嗯！結果已經公佈了，哈哈！阿母啊！按今仔日開始，您愛叫我「第一名」。

朱母：第一名？阿貴啊，慘囉！ 去了了啊！

阿貴：阿母，我考第一名您毋但無歡喜，反倒轉講遮的話是啥物意思？

朱母：你敢知影品貌大會的第一名是啥人？

阿貴：不管查某第一名是啥人，一定是上婿的。

朱母：你就是遮爾巧啦！偏偏和許家的牡丹、金枝全款用錢烏西，這馬榜單嘛攏貼出來了，無法度挽救啦啊！

阿貴：阿母，您佇咧講啥？我攏聽無。

朱母：你著毋知啦！進前，牡丹佻金枝來揣我，挈五百兩銀予我，欲改成績，予

排第一佢第二。所以……

阿貴：所以按怎？

朱母：所以，你免數想會娶著啥物上婿的，第一名是牡丹啦！

阿貴：所以我會娶著……牡丹？

朱母：是啦！事到如今，嘛只好接受了。牡丹伊的老爸是在地的大富豪，你娶伊，  
算來嘛無克虧。

阿貴：天哪！我哪會自揣死路……。阿母，敢講攏無辦法通好想嗎？

朱母：攏怪我想欲藏一寡私奇，無佢恁阿爹參詳，這馬榜單攏已經公佈了，無法  
度改變囉！

阿貴：阿母，誠實攏無步哦？

朱母：沒囉！你哦……。

阿貴：(失意、沮喪) 牡丹生作彼款模樣，嘛想欲嫁予我這個「緣投」的男子漢？

阿母啊！伊醜甲若魔神仔啊，我看著伊著會驚，我無愛娶牡丹啦！

朱母：你哦！欲怪著怪你家己，無代無誌去烏西主考官啦！無要緊，你先按照禮  
法佢牡丹成親，阿母慢慢再閣共你揣較婿的姑娘仔予你做細姨。

阿貴：早知影就莫浪費幾若百兩銀去烏西，結果咧，一袋白花花的銀兩，煞換著  
一个虎霸母……

(燈光暗)

## 第六幕 巧配

地點：朱府（新房內）

人物：朱阿貴、許牡丹、朱母、丫孃

場景：新婚第一天，新房內並無一絲絲喜氣，朱阿貴與許牡丹互相數落，兩人對  
婚事充滿了怨懟，許牡丹並大肆謾罵婆婆。

(牡丹坐在牀緣自怨自艾)

牡丹唱：【】偷雞無著蝕把米，世間哪有這道理，  
滿腹怨氣感哀悲，斷送幸福目屎搵袂離。

（阿貴意興闌珊地走出）

阿貴唱：【】洞房花燭袂歡喜，開錢煞來害家己，  
昨暝惡夢才清醒，透早看著又閤險驚死。

阿貴唸：目矐眯眯，鼻仔扁扁，滿面全是條阿痣，  
粗粗肥肥講話攏是大聲吱。  
看著伊，保證予你吃袂咯又閤暎袂去。  
愈想心裡愈厭氣，敢無法度將伊來休離？

（白）錢財散去已經衰，偏偏又閤娶一个母夜叉，  
物件買錯能退貨，娶到惡妻難反悔。唉……我真衰。

牡丹：死阿貴，你天光就碎碎念，佇咧唸啥貨？毋甘願娶著我是無？哼！你娶  
著我是你三代燒好香，你祖公有共你致蔭呢，若是我嫁予你喔……

阿貴：按怎？

牡丹：是「一蕊好花插佇牛屎頂」。

阿貴：（自語）是啊！只是別人是嬌嬌的桃花，妳是圓仔花，（對牡丹）妳按呢講  
我袂當怪妳，透早妳還袂洗臉照鏡咧，好佳哉，我八字有夠重，若無……

牡丹：若無……按怎？

阿貴：若無，妳就驚死你尪變寡婦了。

牡丹：你……若是嫁像你這款尪，我不如做寡婦！

阿貴：妳……

（丫孃敲房門）

牡丹：你是柴頭，袂曉去開門喔！

阿貴：是是是，妳較大，我來開門。

丫孃：少爺、少奶奶，夫人愛我請恁去廳堂向老爺、夫人請安。

牡丹：啥物？愛我向伊請安，伊共我安排這是啥物爛親事？嫁予伊的了尾啊囡，  
伊閣欠我一个交代咧，愛我去向伊請安？叫伊莫眠夢。

阿貴：妳……愈講愈毋是款「猛虎無發威，你共我當作病貓」

（作勢要打牡丹）

牡丹：你敢拍我！拍某豬狗牛！你人毋做，欲做畜牲，好膽你拍啊！（轉頭向丫  
嬛）你去共伊講，本少奶奶還袂暍飽咧，叫伊慢慢啊等。

丫嬛：……是！

（丫嬛出房，巧遇朱母）

朱母：我是叫你去請少爺、少奶奶，毋是叫你去請神呢，去遮爾久。

丫嬛：夫人，少奶奶叫我傳話，伊講愛您「慢慢啊等」。

朱母：啊好啊！伊共天公借膽，敢叫我「慢慢啊等」。

（朱母氣沖沖入房）

朱母：阿貴、牡丹啊！雖然恁是新烘爐、新茶鈷，嘛袂當將禮規攏放袂記得了，  
日頭攏已經曝尻川了，哪有做新婦的還躲佇房間裡？牡丹啊！妳……

（許牡丹賄賂朱母，卻未能如願嫁得如意郎君，將怒氣傾洩而出）

牡丹：我按怎？我凝得規暝目調皮攏猶袂合起來，透早閣愛聽你唸經……

朱母：哎哟！天地顛倒反了，新婦佇咧教示大家了。

牡丹：教示妳又閣是按怎！

牡丹唱：【】有錢能得做萬般，我開錢請鬼拆藥單，

腳步踏差後悔已經晚，害我一生妳黑心肝。

朱母：妳講這啥物話？當初我嘛是照妳的意思予妳第一名，妳今仔日煞反倒轉來  
罵我。

牡丹：妳明知妳囡阿貴烏西主考官，嘛會排第一，爲啥物毋講清楚？分明是貪圖  
我兜好額，數想欲娶我這個有錢人的千金。

朱母：牡丹啊牡丹！妳共我聽予好，當初我並毋知阿貴烏西的代誌，若是知影，

我嘛袂予伊娶著妳這款無貌閣無品德的某。

阿貴：是啊！早知影我就莫白了工去行後尾門開遐的躉錢。我今仔日嘛袂娶到妳，我會娶到美麗的花勝芳。

牡丹：無講無氣，愈講我愈生氣。佢母仔团聯合欺負我，我……（哭）哪會遮爾歹命啊！

朱母：牡丹！毋是我愛講妳，嫁予我這個寶貝仔团穿金戴銀，有佢位無好？妳歡喜嘛好，無歡喜也罷，妳註定是愛佇朱家奉待我一世人。

牡丹：天啊！這敢猶有天理？妳食錢犯法，我沒去告發妳，妳就愛偷笑啊，閣愛我奉待妳，妳等下世人吧！

阿貴：牡丹，妳毋通龜笑鰲無尾，妳送錢、伊收錢，妳若去告阮阿母，妳敢講著無罪？

朱母：唉！佢莫閣冤了，講來講去，一切攏是報應啦！俗語咧講：「一千兩銀毋值四兩命」阮朱家家財萬貫有啥物路用？娶到歹新婦，我老命就受拖磨。真是悔不當初啊！我哦！真是聰明一世糊塗一時啊！

（唱）【】見錢眼開太不該，千算萬算比快過天安排，

教歹团仔報應來，上樑不正下樑歪。

朱母：阿貴呀！這擺的教訓你千萬愛會記得！

（燈光暗）

## 第七幕 溫情

地點：太倉州渡頭、王家

人物：王群英、花勝芳、陳孟華、王父、王母

場景：（一）花勝芳女扮男裝，於太倉州渡頭巧遇陳孟華，陳孟華主動對花勝芳釋出善意。

（二）王群英雙親引頸盼兒歸，未等到親兒，卻也喜迎孟華帶回的嬌客一



花勝芳。

(孟華、勝芳上)

孟華：這位兄臺，看你敢若是外地人乎？

勝芳：嗯，是呀。哎呀！

(花勝芳腳傷未癒，又長途跋涉，故而彎腰撫腳)

孟華：你的腳受傷是毋是？來，包袱仔我共你揸，我扶你。

勝芳：毋免勞煩您！多謝你，我閣會當行。

孟華：兄臺，你從佢來？欲去佢位咧？

勝芳：我家住桃花村，來遮想欲投親，但是人地生疏，還毋知欲往佢位去？

孟華：桃花村！你是講離這五百里遠蘇州的桃花村？

勝芳：是啊！你曾經去過？

孟華：嗯，幾日前我遇到船難漂流到桃花村，幸運得到善心人的幫助，我才能活命轉來。嗯！你若無棄嫌，就跟我作伙行，暫時躡佇阮兜。

勝芳：(自語)伊的遭遇爲何佢王公子全款呢？敢講 有啥物關係？

孟華：兄臺！你講好毋好？

勝芳：哦！我名叫花勝方，是四方的方，妳叫我勝方就好，請教公子尊姓大名。

孟華：在下陳孟華。

勝芳：孟華兄，你拄才講欲暫時收留我？

孟華：是啊！我佢義父義母以及義弟躡作伙， 做人真熱心又閣好客。

勝芳：既然如此，在下就暫時佇府上叨擾幾工囉！請孟華兄帶路。

(陳孟華、花勝芳下)

(王父、王母上)

王母：老爺，英兒佢伊的義兄孟華出海經商，算算日子，嘛該轉來了。

是按怎……

王父：莫煩惱啦， 可能有代誌耽誤著，才會較慢轉來。

王母：前幾工我的目睷皮一直跳，好親像咱團會拄著啥物代誌。

王父：妳毋通緊張啦！是你傷思念伊，才會黑白想，英兒一定會平安轉來的。

王母：天公伯啊！請祢愛保庇阮團平安轉來啊！

(陳孟華、花勝芳上)

孟華：勝方，阮厝已經到了，我先入內向義父、義母稟明，樹仔跤較秋清，你先去彼邊等我，稍等再閣請你入去。

勝芳：你考慮了對，在下若是直接入去，實在嘛太唐突了，我先過去囉！

(勝芳暫下台，孟華入內)

王母：啊！孟華你轉來了。

孟華：孟華叩見義父義母。

(王母左右張望)

王母：免禮。孟華，你那會家己一个人轉來，英兒人佇佗？

孟華：啥物？義弟猶袂轉來？

王父：是啊！恁鬥陣出門，爲何英兒無倒轉來咧？

孟華唱：【】二月春明風帆出，欲學陶朱經商術，

豈料航行入賊窟，不交錢財性命無。

王母：結果呢？

孟華：義弟不向惡勢力屈服，堅持毋交出財物，與匪徒做生死之鬥，然後我不慎跋落水，義弟的下落我全然毋知啊！

王母：英兒……

孟華：義弟伊吉人自有天相，伊一定會逢凶化吉的，兩位老大人莫煩惱，恁這幾年來晟養我，共我當做親生，我佻義弟嘛情同手足，佇咧義弟轉來進前，我會代替伊盡孝道，奉待義父佻義母。

王母：你有這番心意，實在使人感動。但是，嗚嗚……群英，吾兒啊。

王父：你莫傷心，孟華講的對，吉人天相，群英一定會平安轉來的。

孟華：義父、義母，我猶有一件代誌欲徵求恁的同意。

王父：啥物代誌？

孟華：有一个從蘇州桃花村來的少年人，因為無棲身的所在，我邀請伊暫時躡佇咱兜，毋知恁是毋是同意呢？

王母：出門在外總是較無方便，就暫時予伊躡佇咱兜，人呢？

孟華：伊人佇外口，我去請伊入來。

（花勝芳上，陳孟華引花勝芳入內）

孟華：勝方，這是我的義父義母。

勝芳：勝芳見過伯父、伯母。

（王母上前仔細端詳勝芳，勝芳覺得不甚自在）

勝芳：阿姆，您爲何按咧看我呢？

王母：哦！無啦，我只是對你有一份特殊的感覺。

勝芳：我嘛感覺阿姆您真親切。

王母：阮遮歹所在，你若無棄嫌，就安心躡落來。

勝芳：恁好心收留，予我暫時安身，我感激著已經袂赴了，怎會棄嫌咧？

王父：嗯！安咧真好，我去房間收拾一下通予你歇暍。

孟華：我嘛入內鬥相共。

王父：嗯！

（王父、孟華下）

（王母倒水遞給花勝芳）

王母：你喺乾乎！嚇一寡仔水。

勝芳：阿姆，今日受您杯水之恩，來日勝芳一定湧泉以報。

王母：你言重囉。人講：「在家千日好，出外是半朝難」，人恰人就愛互相，這對我來講只是舉手之勞，一杯茶水有啥物好報答呢？只是，我還毋知你爲何欲來太倉呢？

勝芳唱：【】勝芳本是女嬌生，毋願婚姻毀前程，

喬裝離家步無停，承恁收留才免受飄零，

王母：我早就看出來妳是女兒身囉！妳是講妳的序大人替妳做主的婚姻妳無佻意，才會離家逃婚嗎？

勝芳：毋是父母主意的，是阮桃花村的一種婚姻制度。

王母：哦！啥物款的制度，妳緊講予我聽。

勝芳：凡是適婚年齡的男女，女子會當參加品貌大會；男子就加入文墨擂台的比試，然後將排名結果公佈，名次全款的男女就愛配成夫妻，而且不得反悔。

王母：遮爾特別的代誌，我生日睺發眉毛猶是頭一擺聽著。敢講妳嘛有去參加比試嗎？結果咧？

勝芳唱：【】 考生賄賂實不該，貪官愛財名次改，

倒行逆施天理何在？

（白）爹親爲我做主裁，無愛荒唐的婚姻將我害。

（續唱）愛我遠走伊卻惹禍災。

勝芳：他人賄賂，我卻身受其害，名次殿後。家父母願看我的終身幸福就此斷送，才出此下策，伊甘願承受一切的後果，堅持愛我離家逃婚。

王母：妳爲何毋去報官舉發呢？

勝芳：比試了後，照規定愛先認親，而且佇咧半個月內完婚，但是揣貪污的罪證毋是短短的時間就做得到的，您想看覓，男女雙方成親了後，才發現比試毋是公正的，彼是會破壞僑濟人的婚姻呢？

王母：原來如此，妳誠 替人設想，實在難得。咱有緣熟似，相信這攏是天公伯仔有意咧安排，若無，咱嘛袂一見面就遮爾投緣。妳就安心留佇這共我作伴。

勝芳：嗯！感謝您的厚愛，我感恩不盡。

（燈光暗）

(陳孟華背包袱出)

孟華唱：【】勝芳原來非兒郎，分明一枝嬌豔的海棠，

孟華爲伊心緒動，無端表明太魯莽。

商人行蹤如飛鴻，爲了生計奔西東。

分別日久必定將我忘，戀戀難捨是勝芳。

(白) 我爲著做生理，四處奔波，是欲按怎佢勝芳培養感情呢？唉！今仔日又閣愛出門去……

(花勝芳入，巧遇陳孟華)

孟華：勝芳姑娘，我……我欲出門做生理了，妳……妳……

勝芳：孟華大哥，出門在外，萬事愛多注意。我知影你掛心你的義父義母，你放心，我會照顧 的生活起居。

孟華：既然勝芳姑娘按呢講，我就放心將爹娘交予妳了。我出門囉！

(陳孟華下)

勝芳：我日日思念王群英，毋知影我跟伊何時才會閣再見面？孟華對我有情意，怎奈王群英才是我意中人。

(勝芳轉身擦桌子)

(王母上)

王母唱：【】勝芳是伶俐又端莊，英兒嘛尙未娶妻房，

有意予 配成雙，我就先來試探女紅粧。

(白) 勝芳啊，桌仔莫擦啦！先過來一下。(勝芳走向王母) 我有話欲問妳，妳會用得對我坦白無？

勝芳：阿姆問我的話，我一定坦白講。

王母：我一直共妳當作親生的查某囡看待，妳願意一世人留佇我的身軀邊，莫離開我嗎？

勝芳：勝芳自出世就失去了娘親，阿姆您疼惜我，就親像是我親生的母親，我嘛

想欲一直陪伴佇您的身軀邊有孝您，毋過……

王母：毋過按怎？

勝芳：我離家是暫時的，我無可能棄我的爹親不顧啊！

王母：勝芳，男大當婚女大當嫁，妳只要「嫁來阮兜」，妳全款會用得冇孝妳的老爸啊！等阮後生若平安轉來，我想欲……予妳佢阮囝成親。毋知妳可願意？

勝芳：（自語）我並無佢意孟華大哥，但是我又閣驚傷了阿姆的心，我該如何是好？

王母：勝芳，妳敢有願意？敢講妳已經有佢意的人，伊是誰？

勝芳：這……，我（點頭）……我的意中人是

（勝芳語未完，王父在屋外大喊）

王父：是群英，群英轉來了。

（王母喜出望外，王父衝入屋內。）

王父：英兒伊平安轉來囉！

王母：英兒，阮囝轉來了？

勝芳：敢講……伊拄才講的「後生」，毋是孟華？

（群英上）

群英：爹！娘！我轉來了。

勝芳：王群英！誠實是伊。

（花勝芳見王群英後悄悄入房）

王母：英兒，爲娘想你想得好苦啊。

群英：孩兒不孝，這段時間予恁擔憂了。

王母：轉來就好，轉來就好。恁發生的代誌，孟華已經向阮說明，這段時間攏是伊咧照顧阮。

群英：義兄安然無恙？太好了。阿娘，義兄人呢？

王母：伊又閣出門做生理囉！

群英：等義兄轉來，我一定好好報答伊。

王母：對啦，我欲共你介紹一個人。

（王母轉身找花勝芳）

王母：勝芳呢？拄才猶佇遮，老爺，你敢有看著勝芳？

王父：我看伊回房了。

王母：我去叫伊，勝芳啊，出來一下。

群英：勝芳？敢講只是巧合？

（花勝芳含羞走出）

王母：我共妳介紹，這是阮囡。伊出外做生理拄著海賊，如今平安轉來了。

（群英大喜過望）

群英：勝芳小姐，誠實是妳！

王母：原來恁早就有熟似。

群英：我為救義兄跳落水中，漂流到桃花村。因此熟似花小姐，詳細經過我慢慢再講予恁聽。勝芳小姐，妳離家了後，花伯父一直擔心妳的安危，如今妳平安惦佇阮兜，我應即時返回桃花村向伊報平安，予伊放心。

王母：戇囡仔，你才轉來，按怎閣著急欲走？等你佢勝芳的代誌辦好細，再閣送伊轉去嘛未慢。

群英：我佢勝芳的代誌？

王母：是啊，我毋知你佢勝芳佇桃花村所發生的代誌，但是我看的出來恁互相有意愛，老爺，你看呢？

王父：是啊，為父看恁實在是誠四配，但是少年人的終身大事應該交予 家已決定。

（王母把王群英推向花勝芳旁）

王母：對對對，恁兩個好好的參詳參詳一下。

(王父、王母下)

群英：勝芳姑娘，花伯父因爲品貌大會無公正，愛妳離家逃婚，但是妳可知影文墨擂台的结果何人名落在孫山？

勝芳：既是排行最後，一定是一个不學無術的庸夫。

群英：妳講的庸夫，毋就是小生囉！

勝芳：啊！你……

群英：是啊，我恰妳有全款的遭遇。也因爲按咧，命運又閣將咱牽作伙，所以勝芳，如今妳我名份上應該是夫妻了，群英不才，毋知可有福分恰妳長相廝守呢？

(勝芳低頭含羞不語)

(王父、王母出)

王父：成了！成了！夫人，今仔日咱恰囡、新婦大團圓，實在是天大地大的喜事。

王母：是啊！但是，雖然考試的结果決定是夫妻，我想，嘛愛予拜堂成親，才能成爲名正言順的夫妻。群英，你講是毋是？

群英：母親講得有理，毋知勝芳……

王母：勝芳，敢講妳猶無願意做阮王家的新婦，妳的意中人毋是群英嗎？

勝芳：毋是！啊！是啦！哎呀！我……只是想欲先回家向爹親稟明，相信家父嘛會贊成這樁婚事。

(王父、王母相視而笑)

群英：嗯！理當如此，阿爹、阿娘，我恰勝芳應該先回桃花村，予花伯父……毋對，是予岳父放心，我相信伊嘛會祝福阮。

王父：你打算何時啓程？

群英：當然是……愈緊愈好！

(台上一片歡欣)

(燈光暗)



## 第八幕 歸家

地點：花家、桃花林

人物：王群英、花勝芳、花正東、鄭士青、蘇知縣、蘇夫人、隨從六名

場景：蘇知縣懼怕貪污事蹟敗露，欲先發制人，帶了隨從到花家，春香外出時，門戶未關，蘇知縣大搖大擺進入，花正東見狀無畏強勢、處變不驚。

（蘇知縣及兩名隨從上）

知縣：花正東的女兒花勝芳，因為不服品貌大會的結果而離家出走，全桃花村的人攏佇咧議論紛紛，而且本省新任的巡撫鄭士青閣無倂久就欲上任，伊是花正東的結拜小弟，這件代誌若驚動伊，欲查明事情，萬一共我食錢的代誌攏挖挖出來，我的烏紗帽豈毋是保袂牢囉？

（唱）【】先發制人用心機，養女不教罪難辭，

逼伊趕緊來遠離，若無後悔就已經遲。

拍人先來喊救人，用「藐視律法，縱容女兒逃走」的罪名逼花老猴離開，若無，就將伊終生監禁，關甲伊頭毛生蝨母，這件代誌自然就無人會閣再提起了。我嘛會用得高枕無憂囉。嘿嘿嘿。就按呢辦，（見門未關）門開開，我就直接入內去。

（蘇知縣與隨從入花府，花正東正誦讀經書，見蘇知縣露出鄙夷表情）

正東：原來是知縣大人，來到寒舍不知有何貴事？

知縣：花正東！聽講你的女兒在品貌大會之後，爲了逃婚，已經離開桃花村了。

正東：佇這個靈秀的桃花村，竟然有一寡仔罔顧百姓死活的貪官污吏，這種所在有啥物好留戀的？

知縣：你莫佇遐裡自命清高、指桑罵槐了。你的女兒犯了法，你教子不嚴，理應連坐。嘿嘿，若是識相，包袱啊款款咧，走愈遠愈好。若無……

正東：若無按怎？

知縣：哼！莫講你較早曾任一品官職，就算天子犯法，嘛是與庶民同罪，我就送你去食免錢的牢飯。

正東：我行得正、坐得端，俯仰無愧於天地，何罪之有？有罪的人是你！因為你貪瀆，目無王法、毀滅公平正義，毋知犧牲了佻濟無辜百姓的幸福，你罪無可赦！

知縣：你……你講遮的話有何證據？你閣黑白講，我就加上你一條侮辱朝廷命官的罪名。來人阿！將伊抓起來！

（知縣隨從一左一右抓住花正東）

群英：慢且！

（王群英、花勝芳趕入）

知縣：佻是誰？

群英：我是王群英。

勝芳：阿爹！

正東：勝芳！

群英：你明白阮是誰了。勝芳並未逃走，阮夫妻只是回鄉探望阮的雙親而已。敢講按咧嘛有罪嗎？

知縣：佻……佻是王群英、花勝芳！

正東：佻猶毋將我放開！

（蘇知縣示意隨從放開花正東）

群英：毋但阮，猶閣有一位貴客嘛綴阮轉來了。

（三名隨從分立左右，鄭士青從容步出，蘇知縣見鄭士青出現臉色大變）

知縣：啊！是新任巡撫鄭士青。

士青：你身為父母官，侵門踏戶侮辱朝廷舊臣，而且又將伊當成罪犯，你該當何罪？來人啊！將伊押起來。

（蘇知縣欲逃，被隨從抓回）

知縣：我不服，這只是小小的誤會，我無犯罪就欲將我收押，巡撫大人，這於律法是不容的。

（鄭士青示意隨從放開蘇知縣）

士青：你貪瀆的行徑已經引起聖上的注意了，我這擺就任頭一个就是欲查辦你。

知縣：講我貪污，證據佇佢？人證、物證攏擊出來啊！

士青：王群英，將你所知影的、看到的代誌講出來。

群英：（跪下）是，大人，佇文墨搨台的前一天下晡，草民親眼看著……

（唱）【】**慌慌狂狂朱阿貴，懷抱錢囊鬼鬼崇崇**

**重金送予知縣無白費，胸無點墨榜名佔首位**

知縣：哈哈！太可笑了，就憑伊幾句白賊話就講我貪污，欲定我的罪，想袂到堂堂的鄭巡撫、鄭青天是浪得虛名，照我看來辦案的功力，嘛是三腳貓一个。

士青：王群英，彼个袋銀兩的袋仔可有特殊的所在？

群英：有，彼个袋仔開口的所在，繡了一个「貴」字，朱阿貴曾經對我講，彼是伊的名。

（一名隨從由門外進來，對鄭士青耳語，鄭士青示意後，隨從又走出門外）

（蘇夫人上）

隨從：知縣夫人，你袋仔擊咧共我入去。

夫人：（嘀咕）朱阿貴送來的這包銀兩真重呢，阮老爺足神秘，藏起來驚我知影，好佳哉，我有偷偷看伊藏佇佢位？若無，今日老爺臨時派人講有急用，愛我送這包銀兩來，我欲按怎搨得到？

（侍從帶蘇夫人進門）

夫人：老爺，您欲愛的銀兩，我規包共你擊來了，攏總有八百兩，一銀攏無減。

（蘇知縣大驚失色）

知縣：妳妳妳，這個躉查某，我會予妳害死啦！

（隨從將蘇夫人手中的袋子呈交鄭士青）

士青：頂頭果然有繡一个「貴」字，蘇知縣，人證物證攏齊全了，你猶有啥物話通好講？

知縣：青天大人啊！看在昔日的交情，饒赦我吧！

士青：早知如此，何必當初。我即將上朝面聖，稟報桃花村貪官的無恥行徑，我一定不會將不法之人一并查辦。先將 尪啊某帶落去！

隨從：遵命！

知縣：毋通啊！巡撫大人啊！求你大發慈悲饒命啊！

（隨從押知縣夫婦入）

士青：花兄，予你受委屈了，我為著就任，行船經過蘇州，想欲順道來探望兄哥您，佇渡口，不期拄著勝芳與群英， 向我講明事情的經過，沒想到蘇知縣如此大膽妄為，羅織罪名欲陷害你，好佳哉小弟即時趕到，將伊繩之以法。

正東：士青老弟，想毋到咱分別一年佻，閣再見面，你就替我伸冤，「鄭青天」實在是名不虛傳啊，哈哈！

士青：花兄，你毋通取笑小弟了，小弟猶有公務在身，不便久留，他日再閣登門 恰花兄促膝長談。

正東：如此就無欲強留故人了。

士青：來人啊，備轎，花兄，告辭了。

（花鄭東、王群英、花勝芳恭送，士青、隨從下）

勝芳：阿爹！（王群英、花勝芳跪下）女兒不孝，差一點連累阿爹，求您原諒。

正東：妳何罪之有呢？戇囡仔，起來。

勝芳：女兒有代誌欲恰您參詳。

正東：哦！啥物代誌，妳講。

勝芳：我坐船到太倉州了後，竟然拄著群英的父母。

正東：啊！妳拄著伊的父母。 敢有認妳這個新婦？

勝芳：（臉紅，並向花正東撒嬌）阿爹！人是認真想欲俾您參詳。

正東：參詳啥物？

勝芳：想欲接阿爹轉去「歸家」。

正東：妳咧講啥，我一句攏聽無？欲俾啥人「歸家」？

勝芳：阿爹，您俾女兒離開這個是非之地，作伙去太倉州，搵一个所在安頓落來，  
好毋好！

群英：是啦！等晚生入京赴考，取得功名了後，再閣遵照古禮迎娶勝芳小姐，到  
時，阮就會用得就近探望您，免得勝芳受思親之苦啊！

正東：爲何欲等取得功名了後才欲迎娶勝芳呢？

群英：您袂記我對您的承諾，我欲予勝芳小姐一个幸福安定的生活。

勝芳：功名地位俾幸福的生活有啥物關係？我本以爲你俾世俗的男兒毋全，想袂  
到你嘛有如此功利的思想。是我錯看你了。

正東：勝芳，妳毋應該苛責群英，伊的想法阿爹了解，伊只是想欲做一個負責的  
查甫人，想欲拍拼予妳幸福，妳袂用得怪伊。群英，你有上進之心，我真  
歡喜，但是這與你們的婚事無關。你無夠了解勝芳，世人汲汲營營的功名  
利祿，對伊來講只不過是過眼的浮雲罷了。

群英：（牽起勝芳的雙手，百般憐惜）如今我總算明白了，人間上可貴的是啥物？  
你放心，今後我依然會求上進，但毋是爲著名俾利，是爲著妳對我的信任。

正東：看著恁安咧，我想我嘛應該替我另外一个查某团的未來做打算。

勝芳：啊？

群英：我怎毋知勝芳猶有姊妹？

正東：就是春香啊！我自細漢看伊大漢，伊如同我親生的女兒。

（花勝芳會心一笑並點頭表贊同）

勝芳唱：【】春香自幼不離我，率真善良袂虛華，

### 誰人娶伊好造化……

群英續唱：**我有義兄能得仰賴。**

群英：我的義兄爲人敦厚，有情有義，是一個值得託付終身的人。

正東：真好！等春香從菜園挽菜轉來，才閣問伊的意思，婚姻的代誌就愛尊重少年人，雖然講 兩人有相配，嘛應該先予 培養感情才是。

勝芳：嗯！阿爹說的有理，婚姻大事就愛予伊家已做主。

（花正東、群英、勝芳三人相視而笑）

正東：好！我決定了。

群英、勝芳：決定啥物？

正東：勝芳，妳的母親在生的時陣上恰意桃花，看到桃花，我就想到伊。（感傷）  
我定定獨自佇厝後的桃花林思念伊，佇咱離開進前，先去桃花林走走咧，  
嘛算是向妳的母親辭別。

勝芳：阿爹，您已經答應共阮作伙去太倉了？

正東：嗯！勝芳、群英，咱三人同行去看桃花吧！

（花正東等三人出，流連於桃花林，桃花繽紛飄落）

幕後唱【**落英翩翩春將辭，艷骨寫盡多情詩，  
東風得意有幾時，繁華落盡留枯枝，  
【惜花連枝插玉瓶，傷春暗自淚斑斑，  
百年悲喜一轉眼，二月桃花笑人間。**

（劇終，幕緩緩落下）